

EW NAMOPUNG

A forata ew takises me ew Agency ren fan iten tumunun mwokutukutun nenien aramas, me pwan ren ekkoch popun.

Epwe Pung me ren ewe Legislature-un Chuuk pwe:

Tetten 1. Ekkesiwin. Itenap 29, me non ewe Pukenapen Annukun Chuuk  
iei a ekkesiwin ren an epwe pwan kapacheta Sopun 9, epwe iei usun:

"Sopun 9.

Takisesin Tumunun me Effeiteaan Nenien Aramas me Forutaan ew  
Environmental Action Agency.

Tetten:

1. Takises
2. Kamotiwien Takises
3. Rekotun
4. Forutaan Agency
5. Kootun Agency
6. Katoun Moni
7. Tipisin

Tetten 1. Takises. Ukukun \$.05 takises ren ew tin  
iei a foruta won meinisin tin mei wor carbon non (tinen  
unumi atun suki nge mei puropurouu me non) ren minen unumi  
ika tin mecha ren engon-me-ruu ounus masowen ese wor carbon  
non (ese wor puropur atun suki) chinon chok milk, chocolate  
me chonun ira. Mettoch mei takises me non ei tetten epwe  
kepichino seni ewe takises mei foruta seni Sopun 1, Itenap  
29 me non ewe Pukenapen Annukun Chuuk.

Tetten 2. Kamotiwien Takises. Ei takises epwe  
kapacheta ngeni niwinin ekkewe mettochun un mei nomw non  
ekkewe tin mecha non Chuuk non ewe fansoun ekkewe mettochun  
un ra aewin amommo ngeni aramas. Meinisin takises mei kapach-  
eta non ew maram me ren ewe chon fori aewin amomo ren ekkewe  
mettochun un epwe kamotiw ngeni ewe State Treasurer non ika  
fan mwen engon-me-nimuwen ranin ewe maram epwe tapweto murin.  
Ewe Treasurer epwe pwan fori ekkoch napanapen kepichinon  
mangen momotiwien ewe takises ika mei wor popueochun.

Tetten 3. Rekot. Meinishin chon amomo mettochun un non tin mecha non Chuuk repwe awora rekotun ar amomo me rekotun ar takises, me pwan met sakkun takises mei kawor me ren ei Sopun. Ekkei rekot epwe mumu ngeni ewe Tax Collector me State Treasurer ar repwe katon nupwen mei wor tungorun me reer.

Tetten 4. Forutaan ew Agency. Ew Agency itan Truk Environmental Action iei a foruta. Ei Agency epwe wisan:

- (1) tumunu ewe refund program ren ioien me eniwinin ekkewe poon tinen minen unumi mei takises non Tetten 1 me non ei Sopun seni aramas, iwe nge ewe refund esap chok kukkun seni \$.02 ew tin;
- (2) awora me amwokutu ew program non unusen ewe State an Chuuk fan iten tumunun nenien aramas;
- (3) tumunu angangen me katurunoon poon tin mei ioi;
- (4) forata pwan met sakkun sopai ren amomo sefaan poon tin mei ioi;
- (5) nemeni angangen ioni me koturunoon mesin me taan chitosa, me pwan sakkopaten mwesin mei namotengaw; me
- (6) pwan fori meinishin ekkoch sakkun angang mei chok pwan weweiti ekkewe asan.

Tetten 5. Kootun Agency. Ewe Truk Environmental Action Agency epwe poputa pwan mwokut fan nemenien me emwenien ewe Trust Territory Planning Ofes non Chuuk nefinen tiwe raan me murin kapungunoon ei Nopung. Fansoun an a poputa, ewe State Planner epwe ngeni Legislature anapanapen ewe Agency ren an Legislature epwe apungano.

Tetten 6. Katoun Moni. Meinishin takises mei ioi fan pungun ei Sopun epwe einet nefinen monien angangen ewe Agency me ewe Monienapen ewe Legislature-un ewe State an Chuuk. Ewe State Treasurer epwe eimuno ukukun 80% ngeni ewe Agency ren an angang. Ewe Agency epwe eimuno ukukun 50% me non ewe moni mei kawor seni Legislature ren monien momoon poon tin ngeni aramas mei eniwinato poon tin.

Tetten 7. Tipisin. Meinisin takises ese kamotiw fan pungun Tetten 2 me non ei Sopun epwe nomw non tettenin nukumach" iwe epwe tipis won ukukun 50% met ewe esemwo kamotiw non ew maram. Kamotiw en niwinimangen takises epwe akkomw won ewe niwinin tipis ika pakking. Ren finata pakkingen nukumach ngeni puung epwe wisen ewe Tax Collector. Fansoun a wor taropwen tungor ren an epwe wor mwichen arongorong me affor me ren ewe chon monatiw takises nefinen tiwe raan me murin toun ewe puung, ewe Tax Collector epwe efisi ewe mwich, iwe ewe choon takises epwe affatatiw met an amwani puung seni ewe Tax Collector ika ekkoch popun mei wor, nge ese nifinifin menni nein e fis, ewe Tax Collector epwe finata ukukun ewe takises epwe kamotiw ika pwan tongeni finata ika esap fen chiwen wor ewe pakking nupwen mei kuna ew wewechun popun mei pwano."

Tetten 2 Poputan Pochokunan. Ei Namopung epwe poputa pochokunan fansoun a kapunguno me ren ewe Kepina, ika pusin winiti annuk, nge esemwo pwan kapunguno.

Sain seni: E. S. ...  
 4/11 Tadashi C. Wainit, Speaker  
 Legislature of the State of Truk

Annetata: [Signature]  
 Datsi Albert  
 Legislative Clerk/Secreatry  
 Legislature of the State of Truk

Pwinin maram: 4/5/79

A kapunguno seni: [Signature]  
 Ekhart Aten, Young  
 Truk State Government

Pwinin maram: [Signature]